

Al è online “Ghiti”, il sît par furlan par fruts e gjenitôrs

Il progjet, inclusîf e acessibil, al è indreçât ai piçui dai 3 ai 10 agns e al nas de colaborazion fra ARLeF e Ensoul

Educâ fasint divertî, si pues! Propit chest al è l’obietîf dal **gnûf sît bilengâl “Ghiti”**, nassût de colaborazion fra ARLeF, la Agenzie Regjonâl pe Lenghe Furlane, e Ensoul, aziende di Udin specializade in sîts internet. Il progjet (www.ghiti.it), che al previôt ancje la creazion des pagjinis dedicadis sui social, **al è pensât cuntune atenzion particulâr ae inclusion e ae acessibilitât, jessint indreçât ai fruts dai 3 ai 10 agns, ma ancje ai lôr gjenitôrs.**

Nol è duncje un prodot dome pe utence che e cognòs za la lenghe furlane, ma ancje par chei che no fevelin par furlan. Propit par lôr e je presinte la “modalitât esplorazion”, che e permet di navigâ par furlan, ma viodint tal stes moment la traduzion taliane. «*O sin pardabon braurôs di presentâ la prime plateforme par furlan dedicate dal dut ai plui piçui e ai lôr gjenitôrs. Cun Ghiti o vin fat sù un vêr “mont” a misure di frut, no dome dal pont di viste grafic, ma ancje di chel de fruizion. Al è un strument fat di cartons animâts, videos, zûcs interatîfs, leturis e altris contignûts educatîfs che a savaran a divertîju e a apassionâju al furlan*», al à marcât il president de Agenzie Regjonâl pe Lenghe Furlane, Eros Cisilino, in ocasion de videoconferenze di presentazion dal progjet, là che a àn partecipât ancje l’assessôr regjonâl ae istruzion, Alessia Rosolen, e Fulvio Romanin, titulâr di Ensoul.

«*La ricercje scientifiche – al à zontât Cisilino – nus dîs che une educazion plurilengâl e ufris vantaçs cognitîfs, sociâi e culturâi impuartants. Par esempi si disvilupin plui grandis capacitâts di cjapâ sù lis lenghis forestis, une atenzion seletive e une facilitât intal passâ di un compit a un altri. Chest sît al vûl ancje sburtâ i gjenitôrs furlans a fâ tesaur di chestis oportunitâts ufiertis dal bilinguism*».

La interface e je semplice, imediade e intuitive e si stice la curiositât cun micro interazioni, sunôrs e mecanisims esploratîfs. Ghiti nol è dome il non dal sît, ma ancje il protagonist dal progjet: une besteute che e somee a un riç cu lis gusielis che, dut câs, no sponzin, ma che a fasin sgrisui, daûr di ce al spie ancje il so non! Lui al è il “Ciceron” de navigazion, ma ator di se al à i siei amîs (Crot, Ruie, Ors, Acuile, Pufe, Bolp, Surîs, Sghirate, Cocâl, Sarpint e Stele, une frute) che a menin par man inte navigazion, caraterizant lis areis tematchis e judant i plui piçui a orientâsi.

Analizant invezit **la acessibilitât**: il portâl al è disvilupât daûr di principis cromatics e tipografics **inclusîfs** (si pensi al menù, che al pues jessi movût par facilitâ i çampins); al è acessibil a utents cun disabilitâts tant che il daltonisim e la dislessie (e je une opzion pal

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

contrast alt o par modificâ il test in Biancoenero©, un caratar a leibilitât alte che al à passât lis provis di acessibilitât); cun di plui al è dotât di audio. Al è impuartant marcâ, po dopo, che l'obietîf di chest progjet nol è chel di tignî i fruts denant dal schermi par masse timp. Cun di fat, il sît al bloche la sô fruizion ogni 30 minûts.

Il sît al dopre tecnologjiis *mobile first*, pensadis prin di dut pal telefonut e pal tablet, prin che pal formât desktop. I piçui, di fat, a cjapin contat simpri prime cun chescj struments e a podaran cjatâ in "Ghiti" une vore di contignûts diviers, che si puedin **filtrâ par etât e par tematichis**. Si trate di un imprest educatîf di cualitât, siôr di aprofondiments e di focus, che a mostrin la impuartance di fâ cressi un frut cun plui lenghis. «*Chest sît al è il prin pas di un percors che mi imagjini lunc e virtuôs e che plui indenant, o speri, al rivarà a cjapâ dentri lis scuelis – al à dit Romanin -. O vin lavorât cun cetante atenzion sui aspiets pedagogjics, dant un tai moderni e fûr dai schemis. Chest al vûl marcâ, ancjemò di plui, che o vin di vivi il furlan tant che lenghe dal avignî, no dome dal passât. O pensi, di fat, che cressi bilengâi al sedi un privileç che o vin di jessi agrâts e, inte stesse maniere, formâ un frut tal doprâ plui lenghis al vûl dî regalâi une viertidure mentâl e culturâl impuartante*».

Udin, ai 17 di Març dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<<